



SAKSFRAMLEGG

Saksnr:	Utval:	Dato
	Bygdeutviklingsutvalet	

Sakshandsamar:	Arkiv:	ArkivsakID
Tore Henrik Øye	FE-223, FA-V12	23/101

SØKNAD OM BYGDEUTVIKLINGSMIDLAR TIL KULTURARRANGEMENT I REGI AV STANGHELLE KULTUR

Vedlagte saksdokument:

Søknad om bygdeutviklingsmidlar - arrangement innan litteratur, utstilling og andre kunstformer
Enkelt budsjett Bygdeutviklingsutvalet
Budsjett for 2023 signert
Regnskap 2022 signert
Årsmelding 2022 signert
Vedlikehold og ettersyn av utstyr
Vedtekter signert

Kommunedirektøren sitt framlegg til vedtak:

Bygdeutviklingsutvalet løyver inntil kr. 15 000,- i bygdeutviklingsmidlar til Stanghelle Kultur, v/ Stefano Guisti, for innkjøp av forsterkar til lydanlegg og etablering av nettside som formidlingskanal.

Løyvinga er gjeve med utgangspunkt i retningsliner for tilskot til bygdeutvikling, og utgjer 59 % av godkjent kostnad på kr. 25 500,-.

Tilskotet vert betalt ut etter innsending av sluttrapport, med betalingsoppmoding og kostnadsdokumentasjon.

Utbetalinga vert knytt til faktiske kostnad, med godkjent kostnad som grunnlag.

Løyvinga gjeld i to år, fram til og med 01.03.2025.

Saksframstilling:

Samandrag/konklusjon (kort om saka)

Bygdeutviklingsutvalet har kr. 500 000,- i bygdeutviklingsmidlar til fordeling etter søknad i 2023. Det er utarbeidd egne retningsliner for tildeling.

I søknad frå Stanghelle Kultur, vert det søkt om kr. 15 000,- i tilskot til innkjøp av lydforsterkar og etablering av heimeside. Søkjar har tidlegare fått kr. 30 000,- i tilskot til innkjøp av teknisk utstyr og kompetanseheving.

Kommunedirektøren finn at søknaden er i tråd med bygdeutviklingsmidlane sitt føremål, og går inn for å løyve inntil kr. 15 000,- i tilskot, i samsvar med beløpet det vert søkt om.

Bakgrunn for saka

Bygdeutviklingsutvalet har kr. 500 000,- i bygdeutviklingsmidlar til fordeling i 2023. Utvalet fordelar midlar på bakgrunn av innkomne søknadar, etter innstilling frå Kommunedirektøren. «Mars-omgangen» er den første av to tildelingsrundar.

I søknaden søker Stanghelle Kultur, v/ Stefano Guisti, om kr. 15 000,- i bygdeutviklingsmidlar til følgjande investeringar/tiltak:

- Kr. 7 000,- til å delfinansiere innkjøp av gitarforsterkar med trekk og kablar. Forsterkaren kostar kr. 17 500,-.
- Kr. 8 000,- til å etablere nettside, inkludert grafisk arbeid, med utgangspunkt i pristilbod frå Farfars Reklamebyrå.

Stanghelle Kultur er eit føretak (foreining) som legg til rette for - og tilbyr - kulturopplevingar med hovudvekt på musikk, men også innanfor litteratur, utstillingar og andre kunstformer. Føremålet med tilbodet er å medverke til trivnad og aktivitet på Stanghelle gjennom varierte og spanande opplevingstilbod.

Sidan oppstarten i 2019 er det gjennomført over 20 ulike arrangement for born og vaksne, i følgje søkjar, med Frode Grytten Beat Band som det siste og største arrangementet. Det går vidare fram at mange av tilskipingane vert haldne som «stovekonsertar», med den stemninga dette skapar. Tilboda har samla publikum frå heile Vaksdal, men også frå andre kommunar. Det er òg enkelte gonger delt ut gratisbillettar, for å kunne nå ut med tilbodet til flest mogleg.

Søkjar opplyser at Bygdeutviklingsutvalet ved tidlegare høve, har gjeve kr. 30 000,- i tilskot til teknisk utstyr og kompetanseheving, som er kome svært godt til nytte.

Bakgrunnen for ny søknad om midlar, i følgje søkjar, er trongen for innkjøp av eigen forsterkar, der ein fram til no har lånt slikt utstyr av andre. Samstundes vil utarbeiding av nettside gje ei meir heilskapleg formidling av kva Stanghelle Kultur tilbyr, med betre tilgjenge for publikum.

For nærare informasjon om drifta og tilbodet til Stanghelle Kultur, vert det vist til vedlagt søknad, med rekneskap for 2022 og budsjett for 2023. Dette grunnlaget gjev nærare informasjon om den økonomiske drifta, med inntening og finansieringsbehov.

Formelt grunnlag:

- «Retningslinjer for tilskot til bygdeutvikling», vedtekne 26.05.20.
<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

I følgje kommunen sine nettsider om bygdeutviklingsmidlane, skal midlane brukast til ålmennyttige føremål og leggje til rett for aktivitet i bygdene, med varierte opplevingar og levande bygdeliv.

Med bakgrunn i målsetjinga med drifta, tidlegare arrangement og planlagde tiltak, er aktiviteten til Stanghelle Kultur i samsvar med bygdeutviklingsmidlane sitt føremål og kriteria for tildeling. Aktiviteten til foreininga fell saman med dei verdiane som midlane skal fremje , som gjev grunnlag for å løyve midlar til framtidige gjeremål. Samstundes er kravet til registrering i Brønnøysundregistrene oppfylt, og søknaden inneheld tilstrekkelege opplysingar for sakshandsaming.

Retningslinene til bygdeutviklingsutvalet seier at det kan gjevast tilskot til materiell og utstyr, samt konkrete tiltak som fremjar aktivitet. Det kan soleis gjevast tilskot til både innkjøp av forsterkar og utvikling av nettside.

Søknadsbeløpet kr. 15 000,- utgjer 59 % av budsjettert kostnad på kr. 25 500,-. Om det vert tildelt tilskot i tråd med søknadsbeløpet, vert forsterkaren fullfinansiert ved at det også er gjeve tilskot frå annan, ekstern kjelde. I tillegg utgjer søknaden om kr. 8 000,- til utarbeiding av nettside, også 100 % finansiering av budsjettert kostnad.

Det går fram av søknaden at det vart lagt ned 409 timar med friviljug arbeid i 2022. For 2023 er eigeninnsatsen budsjettert til 300 timar, med oppgjeven verdi på kr. 184 500,- (kr. 615,-/time).

Kommunedirektøren si vurdering er at det er grunnlag for å gje kr. 15 000,- i tilskot, i tråd med søknaden. Retningslinene seier at bygdeutviklingsmidlane kan løyvast i tillegg til andre søknadsordningar, og det er ikkje sett noko tak for øvre, prosentvise finansiering. Det vert også teke med i vurderinga at det ligg ein vesentlege eigeninnsats i botn. Tilrådinga tek også utgangspunkt i tilgjengelege midlar til fordeling, inntekter frå søknadar og det totale søknadsbeløpet. Her er det gjort ei avveging mellom søknadane.

Retningslinene seier at det skal leggjast vekt på geografisk fordeling ved tildeling av midlar, ut frå om søkjar eller bygda der tiltaket er, har fått løyving tidlegare. Både Stanghelle Kultur og andre søkjarar på Stanghelle har fått tildelingar tidlegare. Dette vert ikkje særleg vektlagt, sidan stort seg alle bygder i kommunen har fått del i midlane.

Med bakgrunn i bygdeutviklingsmidlane sitt føremål , retningslinene for ordninga, søknaden sitt innhald og inntekter frå søknadar, går Kommunedirektøren inn for å løyve inntil kr. 15 000,- til Stanghelle Kultur for innkjøp av forsterkar og etablering av nettside.